

欽定古今圖書集成

方輿彙編職方典



欽定古今圖書集成方輿彙編職方典

第五百四十一卷目錄

延安府部彙考一

延安府建置沿革考

延安府疆域考

有圖

形勝附

延安府星野考



職方典第五百四十一卷

延安府部彙考一

延安府建置沿革考

通志府志合載

本府

春秋時白翟所居秦併天下置上郡漢高帝元年更爲翟國尋仍爲上郡項羽以翟王董翳都高奴東漢時郡邑俱廢晉後屬赫連勃勃元魏滅赫連以爲統萬鎮孝武置金明郡宣武置東夏州西魏改爲延州置總管府隋開皇中府廢



置延安郡唐初復爲延州天寶初改延安郡乾元初復爲延州五代梁爲忠義軍唐爲彰武軍宋初因之後改鄜延路置沿邊安撫經略使元祐中爲延安府金皇統二年於延安府置彰武軍總管府元改延安路明洪武二年復爲延安府領州三縣十六

皇清因之

膚施縣

附郭

春秋爲白翟地秦爲上郡地漢翟王董翳都高

奴卽金明塞地後爲膚施縣地屬上郡東漢邑廢三國魏亦廢隋復置屬延安郡唐屬延州延安郡五代梁屬忠義郡唐屬彰武郡宋熙寧五年省豐林縣爲鎮金明縣爲砦並入焉屬延安府金屬鄜延路延安府元屬延安路明爲膚施縣

皇清因之順治十四年裁延安衛入焉編戶四里

安塞縣

秦爲上郡高奴地董翳爲翟王都此漢爲高奴



縣屬上郡南北朝後魏為廣洛縣隋改曰金明  
縣屬延安郡唐武德二年析膚施縣置北武州  
以縣屬焉貞觀二年縣廢屬延安郡宋為敷政  
縣及綏德軍之安塞堡地金為敷政縣屬鄜延  
路元為安塞縣以敷政縣省入明因之隸延安  
府

皇清因之編戶一里實止八甲

甘泉縣

秦為上郡地漢為雕陰地屬上郡南北朝西魏

為真川縣屬神木郡隋為臨真縣屬延安郡大  
業初省真川入焉唐武德元年析交洛之地置  
伏陸縣天寶元年更名甘泉屬鄜州宋為臨真  
縣屬鄜延路元仍為甘泉尋省臨真入焉明因  
之隸延安府

皇清因之編戶二里

保安縣

漢為上郡地唐武德二年置末安縣屬北武州  
貞觀二年州廢屬延州宋置保安軍屬延安府



金大定二十一年陞為保安州屬鄜延路元至元三年降州為縣明因之隸延安府

皇清因之編戶一里實止六甲

安定縣

宋為安定堡元初陞為安定縣至元元年析置丹頭縣四年併丹頭入安定縣明因之隸延安府按縣志春秋戰國時羌戎雜處至漢始屬隴西郡在唐則渭川西市貿馬之所也五代時淪於先零至宋元豐中築安西城屬通遠軍金大

定中改為定西縣屬鞏州貞祐中陞為定西州領西安通西二縣元省二縣入州後因地震改名安定州元末為鞏昌副總帥呂顯所據明洪武元年徐達帥師至鞏昌顯率眾歸附改安定縣

皇清因之編戶九里里止九甲

宜川縣

秦漢上郡地南北朝西魏置汾州義川郡後改為丹州兼置義川郡後周改為丹陽縣隋開皇



初郡廢改爲義川縣大業初縣廢屬延安郡唐分置丹州或爲咸寧郡宋太平興國中改爲宜川縣屬鄜州上洛郡金爲丹州刺史領宜川縣元廢丹州以縣屬延安路明因之隸延安府

皇清因之編戶四里

清澗縣

唐寬州舊壘宋康定初置爲清澗城屬延安府金置清澗縣屬綏德州元省綏平懷寧二縣入焉明因之隸延安府

皇清因之編戶九里

延長縣

秦漢爲膚施縣地南北朝後魏置廣安縣西魏置延安縣又析置義鄉縣隋大業初省義鄉縣入延安屬延安郡唐武德二年以延安縣置北連州並置齊明義鄉二縣以屬之貞觀二年州廢省義鄉齊明入焉廣德元年更名延長屬延州宋屬延安府金屬鄜延路元屬延安路明因之隸延安府



皇清因之編戶十一里實止十里里亦不全

### 延川縣

周春秋時爲白翟地秦爲臨河縣地漢屬朔方郡東漢省南北朝西魏置文安縣及文安郡隋開皇初郡廢改文安曰延川屬延安郡唐武德二年置基州貞觀八年州廢以縣屬延州延安郡宋屬彰武軍熙寧八年省延水縣入焉屬延安府金元仍舊明因之隸延安府

皇清因之編戶四里

### 鄜州

周春秋爲白翟地秦屬上郡漢爲鄜縣屬左馮翊南北朝後魏改爲鄜州後周改爲敷州隋大業初罷州改爲鄜城郡唐復爲鄜州天寶初改爲洛交郡乾元初復爲鄜州宋屬末興軍路金屬鄜延路元以洛交直羅二縣省入明因之隸延安府領縣三按州志禹貢爲雍州之域後漢屬上郡晉置杏城郡後魏初置東秦州改北華州唐天寶初改洛交郡後置保大軍節度宋置



康定軍金因之元初復為鄜州明因之

皇清因之編戶二十三里

雒川縣

漢為左馮翊鄜縣地晉姚秦始置洛川縣取洛川水為名南北朝後魏屬北華州西魏屬敷州隋屬上郡唐屬鄜州洛交郡宋屬鄜延路金屬延安路鄜州元至元四年併鄜城入焉明因之隸延安府鄜州按縣志三代時屬雍州漢左馮翊翟道縣地渠搜中部都尉治此後魏置敷城

縣屬北華州西魏復曰內部後周屬敷州唐復改中部縣置坊州五代名圓州元廢坊州以縣屬鄜州明仍為洛川縣

皇清因之編戶九里

中部縣

漢為左馮翊翟道縣地渠搜中部都尉治此晉姚秦始置中部郡南北朝後魏更置中部縣西魏改曰內部隋屬上郡唐復改中部縣置坊州宋仍舊元廢坊州以縣屬鄜州明因之隸延安



府鄜州

皇清因之編戶一里

宜君縣

漢爲左馮翊祿祊縣地晉苻堅置宜君護軍南  
北朝後魏改爲宜君縣及置宜君郡隋開皇初  
郡廢爲宜州屬京兆郡唐貞觀十七年州縣俱  
廢二十年復置縣屬雍州永徽二年縣廢龍朔  
二年復置屬坊州天寶十二載析置昇平縣宋  
熙寧五年省昇平縣爲鎮入焉金屬鄜延路坊

州元至元四年廢坊州以縣屬鄜州明因之隸  
延安府鄜州

皇清因之編戶一里實止九甲

綏德州

秦爲上郡地漢置雕陰縣屬上郡晉爲赫連勃  
勃所據南北朝後魏置上郡西魏置安寧州兼  
置綏州隋初郡廢大業初改爲上州尋改爲雕  
陰郡唐初爲綏州天寶初改上郡乾元初復爲  
綏州宋太平興國十年沒於西夏治平四年收



復熙寧二年改爲綏德城元符二年置綏德軍屬延安府金大定二十二年陞爲綏德州屬鄜延路元至元四年併義合綏德二縣入焉明因之隸延安府領縣一

皇清因之編戶七里康熙十六年裁綏德衛入焉

### 米脂縣

宋初爲延川縣米脂川寶元元年置米脂砦元豐三年改砦爲城屬綏德軍金陞爲米脂縣屬綏德州元省嗣武克戎二城入焉明因之隸延

安府綏德州按縣志周屬并州春秋時白翟所居戰國爲魏地秦漢屬上郡三國屬魏晉爲赫連勃勃所有宋哲宗元符二年隸綏德金元仍舊明正統中綏德而外米脂魚河地幾三百里迨成化九年都御史余子俊城榆林後復隸綏德

皇清因之編戶五里

### 葭州

秦爲上郡北地漢惠帝五年置囿陰縣屬西河



郡南北朝後魏屬開光郡後周置中鄉縣屬真鄉郡兼置銀州隋開皇初廢真鄉郡爲真鄉縣開光郡爲開光縣大業初改銀州爲儒林縣俱屬雕陰郡唐貞觀二年析儒林真鄉置銀州天寶初改爲銀川郡屬關內道五代爲西夏所有宋熙寧三年收復尋棄不守元豐四年收復五年卽末樂川築新城名銀川砦尋沒於夏崇寧四年收復仍爲銀州五年廢州爲銀川城金初屬河東路汾州大定二十年陞爲晉寧州二十

四年改爲葭州興定二年改屬延安府元至元六年併通秦彌川葭蘆三砦入州明爲葭州隸延安府領縣三

皇清因之編戶三里

吳堡縣

唐爲石州定湖縣地宋元豐五年置吳堡砦金改爲吳堡縣元初省尋復置明因之隸延安府

葭州

皇清因之編戶止六甲



神木縣

秦以前為上郡之北境漢為西河五原二郡地  
後周為銀勝二州地屬雕陰郡隋仍舊唐開元  
十二年析勝州榆林郡之連谷銀城置鄜州新  
秦於都督府開元十四年州廢天寶元年復置  
宋為新秦郡神木砦金興定元年罷軍為神木  
寨元至元六年陞為神木縣屬葭州明洪武六  
年省十四年復置隸延安府葭州

皇清因之編戶三里三分

府谷縣

漢為太原郡地唐置府谷鎮屬麟州五代唐陞  
為府谷縣後建為府州漢陞為永安軍宋崇寧  
元年改為靖康軍政和五年賜名榮河郡保城  
軍置麟府路元初置府州至元六年改為府谷  
縣屬葭州明洪武六年省十四年復置隸延安  
府葭州

皇清因之編戶四里



延安府疆域

延安府

延安府

延安府

延安府

延安府

延安府

延安府


延安府疆域圖







延安府南圖



界西山

界府安西



界府陽慶

界縣寧真







延安府疆域考

府縣志合載

本府

東六百五十里至山西石州界

西五百里至慶陽府合水縣界

南五百五十里至西安府同官縣界

北五百里至沙漠界

西南七百四十里至省城

東北六百二十里至榆林二千二百里至

京師



延袤二千二百餘里

膚施縣

膚施附邑也東六十五里至延長界一百五十里至延長縣二百里至延川縣

西四十里至安塞界

南四十五里至甘泉界九十里至甘泉縣一百八十里至鄜州

北三十里至安塞界一百九十里至安定縣  
東南二百八十里至宜川縣

西南至宜君縣

東北四百里至綏德州五百里至府谷縣

西北四十里至安塞縣二百四十里至保安縣  
安塞縣

府西北四十里為安塞東三十里至膚施界三十里至安定界

西三百里至慶陽界

南二十里至膚施界

北九十里至保安界



西南二百里至鄜州界

東北至安定縣

延袤三百餘里

甘泉縣

府西南為甘泉東一百七十里至宜川界

西四十里至安塞洛河川

南四十五里至鄜州界

北四十里至膚施界

東南至鄜州

保安縣

府西北一百八十里為保安東一百三十里至

安塞界一百八十里至安塞縣

西九十里至慶陽界五百里至慶陽府

南七十里至安塞界三百里至甘泉縣

北一百二十里至靖邊界一百九十里至靖邊

營

延袤三百里

安定縣



府北一百九十里為安定東七十里至清澗界  
一百里至會寧界

西一百里至狄道界一百二十里至龍州堡界  
南九十里至膚施界一千二百里至省城

北一百二十里至綏德界一百二十里至金縣  
界

東南一百六十里至通渭縣

西南二百里至渭源縣

東北六百里至會寧縣迭烈巡檢司三千六百

六十里至

京師

西北二百四十里至蘭州

宜川縣

府東南二百八十里為宜川東一百一十里至

黃河

西八十里至甘泉界

南九十里至韓城界一百里至洛川界

北一百六十里至延長界



西南至中部縣

清澗縣

府北二百五十里為清澗東一百六十里至山

西石樓縣界

西四十五里至安定界

南四十五里至延川界

北一百二十五里至綏德界

東南至延川縣

東北至米脂縣

延袤三百九十里

延長縣

府東為延長東至無考

西一百五十里至膚施縣

南四十里至甘泉臨鎮

北七十里至延川文安驛

西南至雒川縣

東北至吳堡縣

西北至清澗縣



延川縣

府東一百九十里為延川東七十里至黃河一百三十里至山西永和縣

西九十五里至延長界

南二百里至宜川界二百三十里至宜川縣

北十五里至清澗界六十里至清澗縣四百四

十里至榆林鎮

東南一百九十里至山西大寧縣

西南一百二十里至延長縣二百七十里至鄜

州九百二十里至省城

東北一百七十里至山西石樓縣二千一百七十四里至

京師

西北一百四十里至安定縣

延袤約三百里

鄜州

府南一百八十里為鄜州東三十里至雜川界六十里至雜川縣



西一百七十里至慶陽府合水界二百九十里  
至合水縣

南八十五里至中部界一百四十里至中部縣  
五百五十里至省城

北四十五里至甘泉界  
東北九十里至宜川界一百八十里至宜川縣  
二千五百里至

京師

西北一百五十里至安塞界二百二十里至安

塞縣

東西廣二百里

南北袤一百三十里

雒川縣 按以下三縣屬鄜州

州南二百四十里為雒川東一百三十里至韓

城麻線嶺鋪界

西三十里至鄜州廂西鋪界六十里至鄜州六

十里至中部界

南三十里至中部交口鋪界一百四十里至白



水一百四十里至澄城界五百四十里至省城

北九十里至宜川石家鋪界

東南至宜川縣

東北二千七百里至

京師

中部縣

州南為中部東三十五里至雒川交口

西二十里至宜君界長牆

南二十五里至宜君五交河

北六十里至鄜州會桃溝一百四十里至鄜州

東北至宜川縣

宜君縣

州東南三百六十里為宜君東七十五里至雒

川界

西二百七十里至慶陽府環縣界

南六十里至同官界

北四十里至中部界二百一十里至鄜州

綏德州



府東北三百六十里為綏德東一百二十里至  
黃河

西二十里至米脂界石家灣

南二十里至清澗界新安鋪

北二十里至米脂界二十里鋪

米脂縣 按本縣屬綏德州

州東北為米脂東五十里至葭州界陳家岔一

百二十里至葭州

西五十里至綏德沙灘坪二百里至安定縣

南五十里至綏德界八十里至綏德州

北九十里至魚河堡四百五十里至龍坑

葭州

府東北五百八十里為葭州東城臨黃河即山

西臨縣界

西一百餘里至米脂界

南九十里至吳堡界

北一百二十里至神木界

吳堡縣 按以下三縣屬葭州



州東北為吳堡東至無考

西至綏德州

南至延川縣

北一百八十里至葭州

神木縣

州東北為神木東至府谷縣

西至米脂縣

南一百二十里至葭州界

西南三百里至葭州

府谷縣

州東北為府谷東至黃河

西至神木縣

南至葭州界

北至榆林鎮界

西南五百里至葭州

形勝附

本府 膚施縣附郭

寰宇記其城據山四面甚險



圖經西北長城因河為塞洛水之交三川所會  
宋王庶傳延安為五路咽喉

元舊志三城鼎峙秦地要區

綏德學記襟帶關陝控制靈夏

安塞縣 按通志長城為依延水環拱當銀夏

之衝為金明巨鎮

甘泉縣 枕山環洛廊延衝要

保安縣 襟山帶水嶺岡重疊三秦咽喉邊陲

要地

安定縣 按通志岡巒迤邐河澗環流北控金

城南連德順西通隴右東接會州 鞏郡志山

河環繞 翠巘屏拱河水環瀾為西塞之要徑

胡瑞詩山圍四面分賓主 修城記溪山倍於

川原土瘠產嗇

宜川縣 東據黃河南扼子孟門峻嶺廣阜名勝

要區

清澗縣 東據黃河西遶黑水鐘樓官山前後

聳峙為延安扼要之地 岡嶺重疊谿谷深阻



左可致河東之粟右可固延安之勢北可控沙漠之地屹為麟延之衝 舊志前河後塞左澗右隘主草岡而食清流形勝之地也

延長縣 北倚山勢為城南憑延水為池嶺峪險阨屹然巖邑

延川縣 依山為城東北臨壑屹然巖邑古今餉道 延水襟帶層巒疊翠

鄜州 山峙水環城當衝要延州襟喉之地四山雄峙三川紆迴 被山帶河五路咽喉連

西夏而控延朔腋黃河而屏華嶽居三秦上游為北門鎖鑰

雒川縣 山城天塹據險成雄為鄜延衝路

中部縣 北據橋山南環沮水屹然鄜延門戶

宜君縣 城據山巖路當衝要

綏德州 黃河在東長城在北前倚雕山後連理水用武之地 襟帶關陝控制靈夏實為用

武之地

米脂縣 形據山川境連沙漠為延綏咽喉之



地 前對文屏後倚烟洞左黃河右銀水北連

榆林南通關陝雖極衝煩亦為經遠之要地

葭州 亂山迴繞川水夾流崎嶇險阻邊方用

武之地

吳堡縣 因黃河為池據西山為城邊陲負險

之地

神木縣 東阻黃河北控沙漠山谿險隘延州

保障之地

府谷縣 境接沙漠勢據黃河延安之藩籬

延安府星野考

府志

府屬總

史記天官書東井與鬼雍州之分野

天文志斗一至四為魁魁一星曰天樞天市垣

西列十一星其第六星曰秦女十二星周東南

北二星曰秦五車五星其次舍在畢西北一星

主秦

漢書地理志自井十度至柳二度為鶉首於辰

在末為延之分野



晉天文志自東井十六度至柳八度為鶉首於

辰在未為秦之分野按二說分度微異故并存之

唐天文志鶉火實沈以負兩海主於華山太白位

寰宇記北方水位自河曲黃甫川西經榆林至寧夏鎮又西經蘭州踰河至嘉峪關四千餘里得水位之半

神樞清野安定縣屬營室一度取天文玉曆森羅紀內躔次為正

志

清澗縣志清屬古上郡地在雍州之域攷通志當為井鬼之次

鄜州志鄜地應在井鬼之分鶉首之次

雒川縣志雒隸上郡井鬼分野入尾十度

宜君縣志宜為禹貢雍州之域天文井鬼分野綏德州志綏當天文東井十三度又云入尾十度

米脂縣志米當天文東井十三度又云入尾十

度按餘州縣分野同







Blank columns for text on the right page.

職方典第五百四十二卷

延安府部彙考二

延安府山川考一

府志

本府

膚施縣附郭

碧簪山 在府城北一十里形尖如碧簪高可數百丈一名虎頭山

鳳凰山 在城西山凌漢插霄雉堞巍然為郡山首上有鎮西樓范文正建殘碑猶存今重修雲梯山 一名雲夢在北關儒學內



筆架山 在府學之東

太和山 又名蓮華峯在清涼山之巔

亞支山 在城南四十里亞於支山者故名又

俗名野豬山

三臺山 在城南大通寺上

臥虎山 在城南十里以形似名焉

兩川口 在城西三十里自保安來至此兩水

合流入延水

神龍泉 在城西北五里石罅中湧出下有牧

馬場飲此多產駿馬

不流泉 在城東十里清而不流汲之不竭故

名

杏子河 又曰南河自甘泉界經亞支山向北

流至郡城之角嘉嶺山下入延水

杜甫川 在城西南子美居此故名

黃河 在府城東北流經宜川延川二縣境

爛骨泉 在清涼山傳樵子觀仙棊爛骨處

定痃泉 在東關城下尸毘割膚療之故名



鷲峰泉 在清涼山下清冽可愛

龍耳泉 在城南三臺山下

惠民泉 在南門瓮城內

石油泉 在城南二十五里

景致附

曲磴凌霄 清涼山之石路盤折望若懸空

幽崖滴翠 懸崖樓閣層次嶙峋

寒泉漾月 崖畔有懸樓鑿隙下汲泉水月色

盪漾

古塔屯雲 山頂有石塔高聳而煙霧常聚

危欄憑旭 殿閣層次皆有古木危欄可憑望

遠

邃洞藏秋 鑿石為洞深邃而幽四季如秋

穹閣觀瀾 危樓高閣下臨延水潺湲如帶遙

望可觀

晚山開霽 四面環山煙雨常合晚霞霽景則

青翠可挹

空中樓閣 飛簷危欄層次玲瓏故榜其閣上



海上蓬壺 山聳峙於上水流其下望之若海

外仙山

安塞縣

鳳凰山 在城南門外二里

摩雲山 在城西川六十里

墨臺山 在城西南一百二十里洛河川

石門山 在城西南一百二十里兩山壁立如

門洛水經下

金龍山 在城南門外一名龍吟山為南寺主

峯與天澤山相連宋置金明砦於此

女洛峪 在城西南一百二十五里相傳室女

坐化今有寺存

蘆關嶺 在城北一百五十里

翟王泉 在城南山凹俗傳水出則衝縣今埋

之

景致附

山寺晚鐘 在南門外古寺洪鐘響聞數里

河流春漲 延水環城澎湃之勢足聳觀瞻



金龍暮雨 金龍在縣南郊爲南寺主山逢雨  
霽雲收則青翠插天

石鳳曉煙 卽鳳凰山石翼如鳳日初出煙靄  
浮空

甘泉縣

太和山 在城西南五里洛水經其下

雲陽山 荒史循蜚紀雲陽帝都此

麻洞川水 在城東一百二十里南流臨鎮城  
下過宜川雲岩經汾川於石堡砦下流入黃河

景致附

甘泉美水 在城西南五里許有泉湧流飛瀑  
丈餘傳煬帝遊獵至此飲之其味甚甘後縣治  
以甘泉名

洛漲秋聲 卽洛河由保安安塞大川而下注  
經縣治西門外至秋則波浪觸天响聲甚奇

神林晚照 城內伏陸山上層次嶙峋斜陽度  
影更覺可觀

麻川映月 卽城東之麻洞川平川曠野月色



照臨則水天一色

白馬雙峯 近城有白馬天神廟立於山巔兩

峯夾立可以俯觀曠遠

黑龍獨秀 一山高聳秀出有黑龍神祠

東嶽嵯峨 在城東峯巒疊翠

太和聳峙 在城西南三里太和山高聳孤立

俯視羣峯廟宇嶙嶒稱一方名勝

保安縣

三臺山 在城南四十里山從川起三峰高聳

井峙

馬頭山 在城東九十里形似馬頭山高谷深

松柏聳翠上有元帝行宮

金鼎山 在城西一百二十里洛水中央四面

無依兀然孤起高廣各數丈餘勒石為堦穿石

為門可以避亂

東川水 從園林驛下至安塞與延水合

阿姑泉 在城北何氏女化為神岩下有清泉

凡祈嗣者禱飲泉水即應



洛水 按縣志在城西金湯城下流入鄜州直入黃河

景致附

關山霧雨 縣治西隅之關山溝早有青霧即

雨

西陽晚照 縣西城上建一樓與西陽溝對當

日暮時斜陽暉映樓上有光如日之初出

響崖應聲 城東川在大路之南石崖崔嵬隨

呼隨應鼓吹齊鳴其應更奇

石井有水 城西南有石山突起四面皆石崖

無土頂上有井水味甘而潔

安定縣

鳳翼山 城之主山

文昌山 在城東關外上有文昌閣

楊家山 在城三里翠巘環屏上有古塔

泰重嶺 在城西三十里高聳插天晨起雲霧

繚繞

鳳凰山 按縣志在城東五里山起自馬苑回



翔而來集若鳳飛然故名一名照城山以在城東相照映故也

西巖山 在城西二里其山亦起自馬苑蜿蜒數百里與鳳凰山對峙兩山排闥邑中諸山之綱紀也

興雲山 在城東北五里

青嵐峪 在城東三十里其山多嵐氣常青

南安山 在城南一里許自蜀延袤千里止此山頂舊有東嶽廟故俗名廟坡此縣之主山也

其麓縣置義塚在焉

溫泉山 在城東南七十里山形峻拔有溫泉焉

香泉峪 在城西五十里其峪出泉甚甘亦一山水佳處也

胡麻嶺 在城西八十里世傳張騫開西域攜胡麻種歸過此至今山多野胡麻其山自臨洮起伏而來甘河水發源於此

雙峪嶺 在城南五十里



北亂山 在城北八十里巒嶂層出北亘黃河如亂峰然永樂間此山出龍馬山氓莫氏獻於朝遂賜山為牧地今則軍民羣牧之矣

大柏林 在城北三十里

錦鷄原 在城西四十里

東河 在城東門外其水若發源於麻子川環流域之東北合西河

西河 在城西門外發源甸子川其味甘合流三百里至靖虜入黃河二河蓋邑中諸水之綱

紀也

瑞麥川 在城西北四十里嘗產瑞麥俗名好

麥川

甸子川 在城西四十五里物產盛於他里貿

易叢集

煖河 在城西五十里寒冰盡合此水不凝魚蝦生焉俗呼橫河

得羅川 在城西南二十里土脈肥饒

烏龍川 在甸子川東昔有烏龍見於此



五塚川 在城東北二十五里有塚五

麻子川 在城南四十里其水苦

關川 在城北八十里西通蘭州北通靖虜入

黃河

北岔雙泉 在城東南四十里方百里水皆苦

此泉獨甘

景致附

鳳嶺屯霞 城內鳳翼山嶺日暮時煙雲繚繞

霞光燦爛

花岩聳秀 在城東七十里石崖懸空玲瓏如

花

宜川縣

蟒頭山 去城一百八十里山拔起如蟒頭人

曾於迅雷濃霧中隱見天龍每春暮桃花與松

柏之色相錯

八郎山 在城南九十里與韓城分界峻冠萬

山有廟祀八郎神順治五年妖兵盤據於此即

平



壽峯 在城東八十里極為奇險

牡丹原 在秋林鎮東山上其花滿山土人採以為薪

鳳翅山 在城東南五里以形似名每朝煙至日高方散八景中鳳翅朝煙是也

七郎山 城主山也上有石洞門臨以達觀樓傳為楊七郎屯兵處

虎頭山 在城河北二川會於其下八景中虎頭夜月是也

文峯山 在南城外上有大磚塔舉人劉子誠建

高山 在城北九十里聳峙特立俯視羣山上有古石砦

仕望川 在城西四十里自甘泉境流來過平路堡與銀川金川俱會入黃河

白水川 在白水里以水色偏白名流入黃河中有小蟹少黃

河清川 在河清里自韓城硃砂嶺來入黃河



聖惠泉 在縣鳳翅山之渾王廟內深止二三丈龍常吸水於其中旱禱必應且能療疾邑人常飲之

石臺泉 在鳳翅山之大佛閣右水至甘冽

蓮池 在城隍廟右舊學址內

景致附

聖水垂虹 在渾王廟內有聖惠泉龍常吸水於其中祥光輝映

雲岩疊翠 雲岩鎮西有山曰雲岩秀巒層疊

宛如畫景

鳳翅晨煙 在東城外鳳翅山每朝煙至日中

方散

虎頭夜月 在城外河東之虎頭山二川會於其下夜則冰輪相映景色最佳

丹嶺秋容 在城外七郎山爲古丹州治故稱

丹嶺其山蒼松翠色秋晴可掬

蓮池春漲 在城隍廟右舊學址內有池水淋

溢春色媚人



石臺鐘聲 在鳳翅山大佛閣古以石為臺懸鐘叩之聲聞最遠

仙觀水色 在城西五十里有甘泉觀傳有二道自此仙去迄今水色靄浮

清澗縣

烽臺山 在城東二百步上有烽墩故名

鐘樓山 在城南一百步其高數百尺崔巍前

峙舊建鐘樓今遺址猶存

東峯山 在城東一百步清邑第一名境

虎頭山 按縣志在城南二里官道之西

小官山 在城西五十里延安自清化末平過

此山由懷寧田莊達綏德古路

石橋山 在城東六十里

苜蓿嶺 在城東二十里

黑龍原 在城東南三十里

官廳原 在城東北三里

石臼原 在城東南六十里

懷寧河 源自安定縣柏山寺下經縣北八十



五里東流入無定河中

黃河 在城東一百里

黑水河 自安定界來北去縣百里流入懷寧河

小呂梁 在城南四十里張家灣以水勢似之

張憲使刻於崖石

景致附

文昌春暘 俗傳爲呂顯忠將臺今祠文昌澗

水繞麓古柏參天春明更覺奇媚

草場冬雪 古建寬州土城猶存宋時積草於

此縣治枕山雪景極佳

東峰晴空 山不甚高頗平行上有禪林清山

第一名勝雨霽天青暢人心目

鐘岡皓月 舊建鐘樓以節晨昏尚存遺址秋

宵月明四望一色爲城南第一佳境

佛巖涼夏 高巖數十仞澗水潑其下名清涼

巖

濟橋霜天 普濟橋在城南爲烏延達衝鷄聲



殘月人跡塞霜至秋深旅况淒然

石臺壁立 石臺天成相傳宋僧王嵩寓此後

建觀音洞壁立千尋爲清山水口

官山奇聳 山當往來官道上建祠萬山旋繞

二水襟裾景之奇絕者

筆山遠眺 二峰列峙形如筆架爲縣治之右

臂春深樹茂掩映古寺爽氣可挹

無定洪濤 匯衆水而瀉於黃河湍急沙流淺

深不定風起吼聲如雷一名圓水

延長縣

盤龍山 在城西四十里平青鋪臨崖突起延

水經其下

石跋山 在城南五十里有寺

鳳凰嶺 在城東三十里山勢若鳳脰延水西

遶形勢逶迤里稱前鳳嶺後鷄川

交口川 在城東北四十里舊獨戰山下東入

黃河

安溝河 在城南三十里自岔口經安溝由棗



林流入黃河

延川縣

東峯山 在城東一名太和山

禪梯嶺 在城西七十里係縣地扼吭要口中

有石洞

永平川 在延川西八十里

站川 由文安驛流入延川縣河歸黃河

縣河 由縣城外流入黃河

鄜州

高奴山 按縣志在城南一里史記項王封董

翳為翟王都高奴

小山 在城西一百五十里取淮南叢桂之義

御史鄭本立有詩

開元坡 在城北一里唐韋莊詩開元坡下日

初斜拜掃歸來走鈿車

龍尾坡 在城東十里盤旋狀類龍尾故名

大奇原 在城西北五里

子午嶺 在城西二百里



柳池原 在城西五十里

楊圈原 在城西三十里

相里原 在城南二十里

四仙原 在城南七十里

交道原 在城東二十里

儒子原 在城東三十里

郝家原 在城北三十里

趙家原 在城北五十里

河上原 在城西二百里山有石洞知州潘愚

刻天險二字御史鄭本立有詩

落雲石 在城北十里郎中陳棐有銘就下而

安臨流而潔屹然無倚萬夫之傑

大石崖 在城西一百二十里陳棐題飛翠流

紅提學井濟題堆瓊漱玉皆大書刻崖

牛武川 水自牛武城東來入於洛

採銅川 其地產自然銅水東注入洛

火焰溝 在城南百步

丘家溝 州人御史丘野所居因以名焉水西



來入洛在城西北三里

沙飛溝 在城南十里

會道溝 去城八十里

溫泉 在城南一里其水冬溫

雲湫 在城西北十五里祈雨多應

龍湫 離城七十里巨湫周圍數里多蒲葦

人傳龍常在其下

景致附

開元白松 北關山坡唐建古寺內有白松參

天

玉女垂楊 在山城中阿師崖出石泉傳清水

可照玉女洗盆旁垂楊影題味甚多

聖佛晚照 在城東門外山阿名聖佛峪斜陽

將沒則日色與水光相蕩漾

柏山秋聲 在直羅川西唐建古寺內古柏參

天蒼古奇怪四時如秋風吹其葉則淅瀝有聲

雒川縣

燈高山 在城南七十里傳翟王飲馬于洛濟



視山燈為度

大石山 在城北十里上有劉光祿塋

白起山 在城北二十里秦白起屯兵於此上

有家廟為邑之祖山

杜二山 在城北四十里秦杜將軍屯兵處

高山 在城北五十里一名大乘山又名五峯

嶺上有唐建古寺

硃砂神嶺 在城東一百五十里通韓城道

望觀嶺 在城南一百三十里

武帝谷 在城東一百二十里

黃梁谷 在城南七十里

九郎原 在城西南八里許淳化間建九郎廟

土人遇旱潦禱於此

開撫川 在洛川北五十里

盤夾川 在洛川東七十里

圓川水 在城西三十里古縣名

黃連河 在城南七十里古出黃連地跡猶存

石門河 在城南八十里有晉王潭其深莫測



柏林泉 在城南七十里多古柏故名

五眼泉 在城南七十里

不溢池 在城南一百三十里望觀嶺上

五龍河 在城東南八十里

仙宮河 在城南四十里卽仙姑女姊妹三人

經過處

聿津河 在城南一百一十里

廂西河 在城西二十里至三十里鄜州界

領前河 在城西六十里東有翠雲觀

上堡河 在城西六十里有白雲觀

阿師崖川 在城東一百三十里界韓城阿師

悟真於此上有洞阿師遺跡猶存

石堡川 在城東一百二十里出韓城界

日城橋川 在城東四十里

青龍泉 在城南五十里

靈泉 在城北二十里

石家泉 在城北二十里

煖泉 在城東一百二十里泉出山嶺



青泉 在城西五十里

景致附

西郊蓮馥 在西門外三里有蓮池其花甚盛

夏則香聞數里今池涸

仙石松花 卽爛柯山古松婆娑生於石上每

發科第則吐花以兆瑞

中部縣

龍榮山 在城西四里元王九臯築砦于上故

址猶存

白石山 在城西六十里其色白故名

雙鐘山 在城西北七十里形如覆鐘峻秀屹

立

華蓋山 在橋山後三峰秀麗勢如長蓋世傳

爲華蓋

印臺山 在城東二里其形如印

龍首山 在城東十五里卽黃帝龍馭之首山

龜山 在城東二里其形如龜吸飲河水

三鳳岡 在城西北七十里世傳古逸人隱於



此岩間石刻猶存

駱駝岡 在城西百里其形如駝因兵變土人

築砦於嶺

雲霞嶺 在城東十五里龍灣曉霧起於此

石馬嶺 在城東南二十里晉公子重耳卜居

於其下

隋后嶺 在城西北六十里

衙嶺 在城南二里壁經所載沮水經衙嶺即

此

鳳嶺 在城西郭外世傳軒轅截嶰谷竹成律

呂鳳鳴於此

黃花谷 在城西郭外

龍首川 在城東十五里沮水經此至戶局入

於洛

淤泥河 在城北二十五里發源隋后嶺下東

流至龍首川與沮水合

葡萄河 在城北六十里三川河自西北來經

此川東流至交口與洛合



滴珠泉 在城西南一里石岩下滴水如珠舊名黃花泉御史唐琦改名滴珠

黃花泉 在城西南一里泉之西岸黃花如金舊與滴珠泉溷名御史唐琦改滴珠泉而黃花泉始傳其名

柳枯泉 在城南五里沸出懸流旁多叢柳每至秋風葉落隨流漂揚

沮水 在城南門外源發子午嶺二百里東南入於洛

上善泉 在城東北二里唐坊州無井刺史崔駢引此泉入以資日給民甚感之

飛來泉 在城東南三里一名東移其味如揚子江水有石碣立其上

寒沆泉 在城西十里水從地湧深淵不窮大樹重陰夏生寒風有冽沆泉故得名

東義泉 在城東南二十里水從石出冬綠草帶生內有奇異水族

虎圈潭 在城西北七十里



白馬潭 在城東南十里

景致附

橋山夜月 橋山高聳古柏密布山藤夜月映之如荇藻涵水中幽景奇絕

沮水秋風 沮上多佳木秋風至紅葉刀刀下浮水面念伊人者有在水一方之思

龍灣曉霧 龍首傳為軒轅龍馭之首山晨必吐霧瑞色射人目

鳳嶺春煙 鳳凰山逼邑城煙浮其上靄靄繚

繞久而不散

南峪黃花 黃花峪有滴珠泉水滴下皆如花

北橋淨雪 北橋有石大雪霏霏石上如帚掃弗凝

漢武仙臺 祈仙臺漢武所築登其上諸山咸拱禿柏環立凜凜不可久留

橋陵古柏 柏多軒轅手植老幹凌霄似虬龍盤空中鱗甲走動風雨更奇

宜君縣



龍尾山 在城西五里

秦山 在城南九十里山勢綿亙西安界傳秦王田獵於此

龜山 在城西形似龜

龍頭山 在城南

高脊嶺 在城西南七十里

三井嶺 在城東南五里

石龍岩 在城西三十里石上有龍形

仙官岩 在城西北六十里

烽火原 在城南五里夜間望之如明月照映

藝文志云烽火原中夜月明亦縣中一景也

蘭芝谷 在城西十里多產芝草芬馥襲人

慈烏水 在城西四十里源自分水嶺流入本

縣界

五交河 源出縣之西北東流至中部十五里

因五水交合得名行二十里抵十二盤入於洛

姚渠川水 在城西七十里

雷聲溝水 在城東三十里



哭泉 在城南二十里傳孟姜女送夫衣經此渴甚仰哭泉湧

瀑布泉 在城西五十里

綏德州

鳳凰山 在城東四十里相傳有鳳集此又名

鳳宿嶺

文屏山 一名二郎山在關城之南綠樹蒼蔚

峯巒羅列如屏故名

合龍山 在城西五里

五虎峯 在城西北

香爐峯 在城東南十五里

定仙嶺 在城東南七十里武經以為行兵要

路金大定中置第二將營

虎兒焉 在城東八十里

無定河 地輿志云源出沙漠由榆塞經米脂

綏德而勢益大東至清澗境入黃河

龍泉 在城東三里無定河東岸其泉從石龍

口中流出可以溉地



通惠泉 按州志在城西闐閣中引理水以備急用者今廢

米脂縣

張家山 在城東五里

石佛山 在城東七十里

相連山 在城西八十里

馬湖谷 在城西五十里

大理河 源出沙漠經綏德米脂入無定河宋种諤復綏德州夜渡大理水是也

撫寧谷水 在城西六十里

拂岔溝水 在城南四十里

磨石溝水 在城西八十里

背干川 在城北三十里自葭州來流入無定河

龍河泉 在城南二里

小河 按縣志曰流金邑人資汲西流入銀

葭州

鳳凰山 在城北八十里南憑黃河山高數百



初盛夏如暮春

塔兒山 在城西北一百五十里上有小塔故名

麻椿山 在城西北一百五十里

第一峯 在城北五里高出羣峯

獅子岩 在城南三里

萬戶谷 在城南八十里

葭蘆川 在西城下

開光川 在城北一百里

月賓泉 在城北郭外迤西一里許有泉自半

山石崖罅出清冽而甘明弘治間河南道許復

齋來守名曰官泉又菊野郭廷珪來守名曰月

賓

神泉 在州十里許一綫清流自山後出少越

數武清泉洌出者難以數計

黑龍潭 在城西北三十里遇旱禱雨有應

鹽溝 在城北八十里地出鹽泥東距黃河西

抵沙漠為州北要區



吳堡縣

火燒山 在城北十里

神木縣

虎頭山 在城東南一里

駝兒山 在城西南十里

瞭高山 在城東一百步

府谷縣

梁家山 在清水堡東五十里

古城山 在清水堡南一里

瓦窰山 在清水堡西一里

班家嶺 在城西一百里

石山梁 在清水堡北三十里

府志未詳山川

膚施縣志

嘉嶺山 在府城東南形勢高峻宋范仲淹嘗

大書嘉嶺山三字鐫於石

清涼山 在城東北上有尸毘巖相傳昔尸毘

王修行處有萬佛洞又有仙石洞刻石云金皇



統九年梁文仙鑿山半有鷲峯泉於懸崖垂汲  
重覆山 在府城東南二百餘里舊門山縣境  
山形重疊故名

伏龍山 在府城北五里以形似名

五龍山 在府城北一十二里上有五龍祠

牡丹山 在城南四十里產牡丹極多樵者爲  
薪一名花園頭相傳杜甫避亂嘗遊此

延水 在府城東門外源出安塞縣西北蘆關  
嶺東南流入膚施縣境又流經延長縣入黃河

俗稱濯筋水相傳昔尸昆王割身濟鷹於此水  
濯其筋骨因名

南河水 在府城南門外流入濯筋水又名杏  
子河

清化水 在府城東四十里源出嘉泉東流入  
濯筋河

清水 在府城北流至老人谷俗呼爲老人水  
又東經古高奴縣地合豐水

龍尾水 在府城北卽龍尾溪



柳湖 在府城南宋范仲淹詩種柳穿湖後延  
安盛可遊遠懷忘澤國真賞卽瀛洲

烏耶水 在城東北境源出烏耶谷流入濯筋  
水

牧龍川 在五龍山下多產駿馬泉池蓋飲馬  
所也

五龍泉 在府城東關五龍山下石罅中湧出  
有雄吼之聲匯而爲池上有五龍堂

嘉泉 在膚施縣境舊豐林廢縣東北水湧出

如團碾可嘉因名

暖泉井 在府治南泉有九眼味甘美冬溫夏  
冷遇大寒流溢不凍甚濟居人

范公井 在嘉嶺山半當二水合流之衝范仲  
淹于山上爲寨鑿井備寇後人以名

安塞縣志

三塏山 在舊敷政縣境土石相雜上有三塚  
遙望如塏故名

靈臺山 在城北五里一名石嘴山巨石高險



天澤山 在城東五十步上有天澤泉

西川水 自保安縣黃花城東南流會小平川

延水 在城北一百里

涓水 在城西北九十里入延水漢書高奴有

涓水可蘸

圓水 在城西北即塞門本無定河之一也司

馬光詩圓水猶傳檄即此

金明川 在城北五十里隋改置金明縣取此

洛水 在城西七十里流經城下

龍湫 在城西百里間有上下二處禱雨皆應

龍潭井 在城西南一百二十里潭深水清四

時不竭禱雨輒應

甘泉縣志

伏陸山 在城內東面唐置伏陸縣因此山而

名

雕陰山 在城南二十里山多土穴為鷹雕所

居唐韋莊詩雕陰寒食足遊人金鳳羅衣濕麝

熏即此



野豬峽 在城北四十五里山峽險窄戍守之地

溫泉山 在城南四十三里下有溫泉故名

勞山 在城北二十里有大小勞山相傳宋狄

青與夏人相拒士卒疲困憇于此

洛水 在縣西百步源出慶陽府洛源縣

庫利川 在城東北土田沃壤五穀豐饒羌人

稱貯舊穀為庫利

甘泉 在城南五里岩谷中飛流激下隋煬帝

遊此飲而甘之取入禁中泉側縣以此得名有奇鳥身白足赤如小山鵲其聲數種

臭水 在城北十里河中有一泉其色青黑聞之而臭人言下有銅礦

阿伏斤水 在城東北三十里源出大盤山東南姚嶮谷流入洛川河

清泉 在城東四十里流出板橋溝入洛河水甚澄清雖澇不濁

煖泉 在城南三里其味甘美夏極涼冬則煖



保安縣志

候雨山 在城西一里旁有石室天將雨則此山煙霧四塞人以爲候

石樓臺山 在城南七十里山挺洛川之隈奇峯突兀峭壁陡絕下臨重淵土人上築寨旁鑿崖窰居之

艾蒿嶺 在城東六十里卽子午嶺之分名也  
呂布生于此地有呂布窰

九吾山 在城北八十里上有湫歲旱禱雨輒

應宋立廟封神爲應順王今民猶歲時祀之

吃莫水 在縣境源出蕃部吃莫川南流入洛河不勝船筏

三岔溝 在城北九十里

紫馬溝 在城南四十里相傳三國時收紫馬於此

圓水 卽縣河發源靖寧兩峪流入洛  
安定縣志

二郎山 在城南一里雙峰并立故名



鴉鴿山 在城南四十里上產鴉鴿二鳥并居亦鳥鼠同穴之類

神木山 在城南六十里古樹千株樵採不敢入人以爲神

滴溜山 在城北一百里泉溜下滴古柏森然亦邊境之幽勝者

潘陵川 在城南八十里發源鴉鴿嶺南流入府河

宜川縣志

安樂山 在城南一十里相傳昔時屯兵於此

主帥命唱安樂詞以慰勞諸軍故名

庫利山 在縣境亦與舊臨真縣相接

雲巖山 在城北八十里山形重疊如雲金嘗于此置雲巖鎮

孟門山 在城北八十里石澗下三里黃河中流有石扼之禹鑿石導流之處

晉師山 在城西南一百里與鄜州分界晉文公會駐師於此



盤古山 在城東南一百二十里古碣剝落難  
讀俯視萬山如黍豆之案傳爲盤古氏初卜婚  
處

黃河 在城東八十里

分水川 在城北八十里源出甘泉縣界東流  
入黃河

玉蓮池 在城北廣數千頃多種異蓮爲一方  
之勝

丹陽水 在城西南自洛川縣來流入縣界川

口有赤石因曰赤石川

銀川水 在城西一里圍繞縣城北流合城南  
河

澤徑水 在城北一百二十里之外東流入黃  
河

聖馬溝 在城北九十里上有馬跡相傳唐太  
宗遺跡

清澗縣志

筆架山 在城西一百步三峰秀峙形似筆架



故名

草場山 在城北一百步亦名砦山宋种世衡積草處

官山 在城北五十里萬山旋繞二水襟裾通往來官道

吐谷嶺 在城東二十里

清澗水 在縣西城下自安定界來南流入黃河

無定河 在縣東八十里自綏德州界來流入

黃河一名奢延水又名銀水即圓水也後人因潰沙急流深淺不定故更今名唐陳祐詩無定河邊暮笛聲赫連臺畔旅人情函關歸路千餘里一夕秋風白髮生

种公井 在縣治西即石井宋种世衡所鑿初世衡城清澗據險無泉鑿地十五丈遇石世衡命屑石一畚酬百錢卒得泉萬人歡呼曰神乎雖敵兵重圍吾無困渴之患矣

延長縣志



屏山 在縣南一里屹然高聳四時花木蒼翠望之如屏故名

高奴山 在城北二十里上有古寨

獨戰山 在城東北六十里山險峻一人獨戰可以當千交口川繞之

漱玉巖 在縣治東其中可容百人泉出如練因有漱玉之稱其流入鴛鴦渚

九連山 在城西十五里有九峰相接不斷故名

黃河 在縣東境

延水 南自膚施縣界流入縣界一名翟水即濯筋水

油泉 在翟水南內有一孔油水迸出油浮其上水沉其下居民取以燃燈

延川縣志

青眉山 在城西北六十里後魏時有土番青眉族居此

西山 在城西一里



玉皇山 在城西北八十里

小瞿唐 南為岡北為碛中有石澗甚隘前高

後下水由上流入清濤湍急噴湧如雪故以小

瞿唐名雲間張文藻於石碛下鑄有山水奇處

四字

黃河 在縣東境

清澗水 在東城之下北流合延水入黃河

吐延川 在城北自綏德州流入黃河一名哥

基川即濯筋水

石油井 在縣北九十里井出石油即脂水也

每歲六月取之塗治瘡疾采燃為墨黑光如漆

鄜州志

壽峰山 在城南一百二十里其峰類壽星

大迴嶺 在城南十里以唐杜甫入蜀時迴車

瞻望于此故名

梅柯嶺 在城西北三里相傳有梅樹為杜甫

手植者

龜山 在城西一里以形似名



櫻桃山 在城南五里多產櫻桃

葦谷 在州南三十里谷有水東南流入三川

多蘆葦故名亦名聖佛谷唐鄭玉詩水會三川

漾碧波雕陰人唱採花歌舊時白翟今荒壤葦

谷淒淒風雨多

洛水 在城東百步

三川水 在城南七十里以華池水黑源水洛

水同會謂之三川唐杜甫詩三川不可到歸路

晚山稠落鴈浮寒水饑鳥集成樓

雒川縣志

黃龍山 在城南一百三十里常有黃雲籠罩

其上彷彿如龍搖曳

爛柯山 在城東北七十里相傳為王質遇仙

爛斧柯處

雄兒山 在城東五十里

聖公山 在城東七十里二山皆據險保障之

地

界頭山 在城東南五十里澄城縣分界故名



黃梁水 在城東七十里源出爛柯山下西南流入洛按名勝志謂谷舊無水姚萇時立節將軍楊班夜中有人借車牛云欲移徙班備車牛置門前至明車濕牛汗尋車轍至乾谷忽有水洛水 在城西南五十里自鄜州南流入中部界

中部縣志

橋山 在城東北二里舊傳沮水從山底經過如橋即軒轅黃帝葬衣冠之處

玉仙山 在城西五里時有仙人往來於此

石堂山 在城西北四十里一名翟道山周穆

王傳天子命駕八駿之馬造父為御南征朔野徑絕翟道升於大行即此

鳳凰山 在城西一里以形似名每遇金秋黃

菊芬芳香氣襲人

仙掌巖 在城西北三里以形似名

子午嶺 在城西二百里

沮水 在縣南自子午嶺來二百里東南流入



洛水

子午水 在城西北七里源出子午嶺流入沮

水即三河水

淺石川 出翟道山與泥浴水及南北二鄉水

合流入沮

一線泉 在城西南一百八十步泉垂如綫其

味清甘酌之可以療疾

煖泉 在城南三里泉流湧出隆冬不凍其味

甘美

宜君縣志

玉華山 在城西南四十里唐太宗建玉華宮

以此名山宋雍熙初於此山獲一角獸時以為

麒麟金於此置玉華鎮

太子山 在城東南四十里世傳秦扶蘇築長

城時所憇

香山 在城西北十里多產香草得名

駐鑾崖 在城西相傳唐太宗駐鑾于此玉華

水出焉



鳳凰谷 在城西南五十里嘗有五色雀見於此因名唐玉華宮建于此谷

子午水 在縣北一百三十里源出子午嶺東南流入中部縣合沮水

慈烏水 在縣西四十里源自子午嶺東流本縣界

洛水 在城東北八十里自鄜州界來入白水界

煖泉 在城東七十五里文興村冬溫夏涼噴

湧如珠

綏德州志

疏屬山 在州城內貳負之臣曰危與貳負殺窆蘇帝乃梏之疏屬山桎其右足反縛兩手與髮繫之山上本在開題西北漢宣帝使人發上郡疏屬山於磐石室中得一人徒裸被髮反縛械一足因問群臣莫能曉劉向按此言對之宣帝驚異始重文學

鳳凰嶺 在城東四十里相傳有鳳集此又名



鳳宿嶺

雕山 在城外西南一名嗟我層累迭出狀如

鶻雕漢雕陰縣以此名

大理水 在城西北出大漠東流入無定河宋

种諤復綏州夜渡大理水駐師即此

圓水 經米脂縣過城東至清澗入黃河即無

定河

嗚咽泉 在城東五里即秦扶蘇死處事見陵

墓唐胡曾詩舉國賢良盡淚垂扶蘇屈死樹邊

時至今谷口泉嗚咽猶似當年恨李斯

米脂縣志

峯子山 在城西十里

高梁山 在城西南二十里

無定河 在城西北自大漠來流經縣境入綏

德界大理河小理河注之

米脂水 在城東一百步西流入無定河

溥惠水 在城內明成化間鑿民甚便之

煖泉水 在城東七十里東流入葭州



葭州志

白雲山 在城南五里

橫嶺 在城南十里以狀橫若屏風故名

箭括塢 在城西三十里多產竹箭

黃河 在城東

葭蘆水 在城西五里岸多蘆葦故名宋元豐

中於此立寨

吳堡縣志

寨西山 在城西一里宋置吳堡寨於此金為

縣故名

龍鳳山 在城南十里

黃河 在城東一里

清河溝 在城西二十里黃河水濁此獨清

神木縣志

香爐山 在城東一里明武宗戊寅幸榆林駐

蹕於此

龍眼山 在城東南一百步峯上有二孔透穿

如龍眼



屈野川 在城西南一百五十里舊為銀城縣

曲源水 在城西南源自河陰來流入黃河

老龍泉 在城西北十八里旱禱輒應

府谷縣志

五虎山 在縣治東上有五峰勢若伏虎下有

香爐山曾有仙人煉丹於此

桃花洞 在縣南崖東崖中有硃砂洞光艷若

桃花南崖畔有千佛洞

黃河 在縣百步許流入神木縣

清水 在城北五十里西北自大漠來邊方士

騎賴以汲飲設以營堡即以清水為名

河套附

府志

河套東接山西偏頭關西至寧夏鎮相距二千

里而遙南則限以邊牆北濱黃河遠者八九百

里六七百里近者亦二三百里惟黃甫川之南

焦家坪及孃孃灘半圈渡口為最近其地東北

有大山而河流其中濱河之地往往有城郭皆

漢縣也河水自富平故城而來東北逕渾懷障



都尉之所治而障之西南有忻都城又軍腦兒城省崑城峰城兒駱駝山麥塚山舊花馬池石崖山河水出其西山上之石自然有文盡若戰馬之狀故亦謂之畫石山河水又過朔方臨戎縣西北逕三封故城臨戎者王莽之所謂推武而啞把湖在其南也河水又東逕沃野故城遂北屈而爲南河又北迤西溢於嵐渾縣故城東又自縣西出鷄鹿塞其水積而爲屠申澤澤東西一百二十里河水又屈而東爲北河逕高闕

南昔趙武靈王自代竝陰山下至高闕爲塞山下有長城連山刺天兩岸雲舉故名闕也又東逕臨河縣故城北漢武帝封代恭王子劉賢於此爲侯國又至河日縣故城西又東逕陽山南自高闕以東夾山帶河而至陽山皆北假也秦使蒙恬將十萬人北渡河取高闕據陽山北假中是也河水又東逕廣牧縣故城北有東部都尉治又南逕馬陰山西漢時稱陽山在河北陰山在河南者是也陽山之間有東勝州城唐龍



鎮而陰山一名鍾山東西千餘里單于之苑囿也河水又東逕朔方縣故城東北連鹽澤青鹽澤併在縣南有蓮花城紅鹽池在其東長鹽池在其西漢置典官治又東轉逕渠搜縣故城北又逕西安陽故城屈過九原縣南又東過沙南縣北而南流入君子濟遂與囿水榆溪諸水合爲黃河焉而其中小水之支流者黃羊城東之牛心山山東北有月兒海子水石窰山城東海子山有水出其下白城子紅城子交城子之東

有北海子水佛堂寺溝水鴛鴦湖水卯孩水紫河水皆混濤歷峽而分注于河蓋禹貢之析支渠搜也秦爲新興中漢爲朔方郡領縣十晉因之後爲夏赫連所據周爲蕃戎落立朔州以統之隋置勝州榆林郡唐以降突厥置六州曰魯曰麗曰含曰塞曰依曰契以唐人爲刺史武后時併爲匡長二州中宗神龍二年置蘭池都督府分六州爲縣明皇十年復改爲州又增置宥州天寶中改寧朔郡景雲二年張仁愿於河北



築三受降城先是朔方軍與突厥以北河爲界界有拂雲祠突厥將入必先詣祠祭禱求福因牧馬料兵候冰合渡河時默啜盡衆西擊婆葛仁愿乘虛奪取漠南之地築三城相去各四百里皆據津濟北拓三百餘里於牛頭山烽堠百八十所自是突厥不敢度山南牧後安祿山反天子幸蜀肅宗至靈武以朔方兵授李郭諸將東討史思明安慶緒雖兩京恢復而鎮兵遂單弱不振矣憲宗時復置宥州於長澤縣唐末拓

拔思恭鎮是州討黃巢有功賜姓李遂有銀夏綏宥靜五州之地五代及宋爲李夏所併元滅之廢宥州設西夏中興尚書省明初爲王保保所據追逐之築東勝等城并立屯戍英宗天順六年春毛里孩等入河套河東劉敏寬曰按榆塞古朔方地河流自西而東由寧夏橫城折而北謂之出套北折而東東復折而南由黃甫州入葭州界謂之入套紆迴二千餘里環抱河南之地謂之河套自古郡縣繡錯其中明初卽唐



受降城故地營東勝迨東勝不守外險旣失鎮  
兵駐綏德苦於遙制余子俊巡撫延綏相度形  
勢東至青水之紫城西至寧夏之花馬池築邊  
牆二千里增置營堡創榆林衛移綏德重兵鎮  
於此清釐陝人有五籍詭落及罪謫者徙實之  
擇其才子弟爲建學立師教之又開界石外地  
興屯田歲得糧數萬石事皆創始而經畫煥然  
自是榆爲雄鎮矣



